



Laporan pengurusan COVID-19 dibentang 30 Oktober ini

Oleh Zanariah Abd Mutualib - Oktober 19, 2023 @ 1:57pm

zanariah_mutalib@bh.com.my

KUALA LUMPUR: Jawatankuasa Kira-Kira Wang Negara (PAC) akan membentangkan Laporan Pengurusan Wabak COVID-19: Vaksin Luput Tempoh Hayat, Peralatan Ventilator Tidak Dapat Digunakan dan Lebihan Peralatan Perlindungan Diri (PPE) di Dewan Rakyat, 30 Oktober ini.

Pengerusinya, Datuk Mas Ermieyati Samsudin, berkata PAC selesai mengadakan lima prosiding bagi penyediaan laporan itu dari Jun hingga September lalu dengan memanggil 12 saksi.

Antaranya ialah Ahli Parlimen Ayer Hitam, yang juga bekas Menteri Pengangkutan, Datuk Seri Dr Wee Ka Siong; Ketua Audit Negara, Datuk Wan Suraya Wan Mohd Radzi; bekas Ketua Setiausaha Kementerian Kesihatan (KKM), Datuk Seri Chen Chaw Min; bekas Ketua Pengarah KKM, Tan Sri Dr Noor Hisham Abdullah; dan Pengerusi Pharmaniaga Berhad, Izaddeen Daud.

"Isu ini dilaporkan dalam Laporan Ketua Audit Negara (LKAN) Tahun 2021 Siri 2, Aktiviti Kementerian/Jabatan Kerajaan Persekutuan dan Badan-Badan Berkanun, malah turut didebatkan ramai Ahli Dewan Rakyat ketika membahaskan LKAN pada 6 Jun 2023," katanya pada sidang media di Parlimen, hari ini.

Mas Ermieyati yang juga Ahli Parlimen Masjid Tanah, memaklumkan prosiding Menteri Kewangan (Diperbadankan) – FELCRA Berhad yang sepatutnya diadakan semalam, ditangguhkan.

Katanya, ia berikutan Pengarah Pengurusan WZR Property Sdn Bhd, Datuk Wan Nadzir Wan Mohamad tidak dapat hadir kerana berada di luar negara ketika ini.

"Untuk berlaku adil kepada beliau dan syarikat, PAC memerlukan keterangan dan penjelasan Datuk Wan Nadzir kerana beliau terbabit dengan perkara yang ingin disiasat PAC.

"Susulan itu, saya mohon saksi berkenaan hadir bagi membantu PAC melengkapkan siasatan terhadap isu ini," katanya.

Beliau turut memaklumkan, PAC akan memulakan prosiding berhubung Pengurusan Dana Latihan dan Keberkesanan Program Latihan HRDCorp pada 23 Oktober ini.

Katanya, isu itu tidak dilaporkan dalam LKAN, justeru PAC menggunakan punca kuasa di bawah Peraturan Mesyuarat 77 (1) (d), Peraturan-peraturan Majlis Mesyuarat Dewan Rakyat untuk mengadakan prosiding berkenaan.

"Saksi yang dipanggil untuk prosiding ini ialah Timbalan Ketua Setiausaha (Dasar dan Antarabangsa), Kementerian Sumber Manusia, Datuk Amran Ahmad dan Ketua Eksekutif HRDCorp, Datuk Shahul Dawood," katanya.